

XXVII

Èt mitnaint, bîn chur, çoli fâit dje ché ans... Î n' aî djmais encoé rcontè çt' hichtoire. Les caimrâdes que m' aint rvu sont aivu bîn aîjes de me rvoûr vétiaint. Î étôs trichte mains i yos diôs : Ç' ât lai sôltè (*fatigue*) ...

Mitnaint i m' seus ïn pô concholaie. Çoli-veut-dire... pe tot è fait. Mains i saîs bîn qu' èl ât rveni en sai piaînnatte, poéchque, â y'vè di djoué, i n' aî p' eurtrovaie son coû. C' n' était p' ïn coû taint poijaint... Èt i ainme lai neût oûyie les yeûtchîns. Ç' ât cment cîntyè cent miyons de griyats...

Mains voili qu' è s' pèsse âtye d' échtraoûrdnére. Lai meûtlie qu' i aî graiyonè po lo ptét pñnce, i aî rébiè d' y' aidjoutaie lai corroû de tiû (*cuir*) ! È n' airaî djmais poéyu l' aittaitchie â moton. Aidonc i m' demainde : « Qu' ât-ce que s' ât pèssè tchu sai piaînnatte ? Craibîn bîn qu' lo moton é maindgie lai çhoué... »

Taintôt i m' dis : « Chûrment nian ! Lo ptét pñnce ençhoûe sai çhoué totes les neûts dôs son yôbe de voirre, èt è churvoiye bîn son moton... » Aidonc i seus hèy'rou. Èt tos les yeûtchîns riant bâlment.

Taintôt i m' dis : « An ât dichtraît ïn cô ou l' âtre, èt çoli cheûffit! Èl é rébiè, ïn soi, l' yôbe de voirre, ou bîn l' moton ât soûtchi sains brut di temps d' lai neût... » Aidonc les griyats se tchaindgeant tus en laîgres !...

Ç' ât li ïn bîn grant michtère. Po vos qu' ainmèz âchi lo ptét pñnce, cment po moi, ran de l' eunivie n' ât pairie (*semblable*) che quéque paît, an n' saît laivoû, ïn moton que nos n' coégnéchans pe é, âye ou bîn nian, maindgie ène rôje...

Raivoéties l' cie. Dmaindèz-vos : l' moton ât-ce qu' èl é maindgie lai çhoué, âye ou bîn nian ? Èt vos voirrèz cment tot tchaindge...

Èt piepe ène grante dgen ne compâré djmais que çoli é taint d' ïmpoétchaince !

Boé, lo 21 de feuvrie 2024